

JARIDA LA

WIZARA YA UTAMADUNI, SANAA NA MICHEZO



Wizara ya Furaha

Toleo la Mtandaoni: 10 | 13 Agosti, 2022 - TABORA | www.michezo.go.tz

MASHINDANO UMISSETA 2022 YAPAMBA MOTO



Wizara_SanaaTz





MASHINDANO UMISSETA 2022 YAPAMBA MOTO

13 Agosti, 2022



Ngoma za Asili zaleta Ushindani UMISSETA 2022

Na Shamim Nyaki – WUSM

Ngoma za Asili ni miongoni mwa michezo ya Sanaa inayofanyika katika michezo ya Shule za Sekondari (UMISSETA) Mkoani Tabora.

Mkoa wa Arusha ndio uliofungua jukwaa katika mashindano hayo yaliyofanyika Agosti 13,2022 katika Ukumbi wa Chuo cha Ualimu Tabora kwa kuonesha ngoma za asili ya Mkoa huo unaohusisha makabila ya wamasai, wameru na wa

Arusha, huku Mkoa wa Kagera wakionesha umahiri wa kucheza ngoma ya kabila la Wahaya.

Kwa upande wa Mkoa wa Dodoma, Wanafunzi walicheza ngoma ya kabila la wagogo ambayo huchezwa katika shughuli mbalimbali ikiwemo wakati wa mavuno na sherehe, ambapo Mkoa wa Dar es Salaam ulicheza ngoma ya kabila la wazaramo ambao pia wanapatikana mkoa wa Pwani.

Aidha, Mkoa wa Singida ulionesha umahiri kupitia ngoma ya kabila la wanyiramba wanaopatikana wilaya ya Iramba huku Tanga ikicheza ngoma ya kabila la Wazigua wanaopatikana wilaya ya Handeni.

Mashindano hayo yanahusisha kucheza ngoma za Mkoa wanaotoka wanafunzi pamoja na ngoma ya mkoa wa jirani watakaochagua wenyewe.



Tanga Yaibuka Bingwa Kurusha Kisahani UMISSETA 2022

Na Shamim Nyaki – **WUSM**

Mkoa wa Tanga umebeba Medali ya Dhahabu katika mchezo wa Kurusha Kisahani Wavulana na Wasichana, kwenye mashindano ya Michezo kwa Shule za Sekondari Tanzania (UMISSETA) mkoani Tabora.

Katika michezo iliyochezwa Agosti 23, 2022 Uwanja wa Tabora Wavulana, Mkoa wa Tanga upande wa Wasichana kupitia mwanafunzi Marietha Msigwa Waameibuka Bingwa baada ya kurusha Kisahani umbali wa mita 29: 50.

Kwa upande wa Wavulana, Juma Yusuph kutoka Tanga nae ameuletea heshima Mkoa huo kwa kupata Medali ya Dhahabu baada ya kurusha Kisahani umbali wa Mita 30: 53.

Mshindi wa pili katika mchezo huo upande wa Wavulana ni Mkoa wa Kigoma kupitia mwanafunzi Ramadhani Kassim ambaye pia ndio mshindi wa pili katika kurusha tufe.

Kwa upande wa Wasichana, Mkoa wa Manyara umeibu-

ka mshindi wa pili kupitia mwanafunzi Debora Basan ambaye alitumia vizuri nafasi hiyo kuupaisha Mkoa wake.

Washinda hayo wameeleza siri ya ushindi ni mazoezi kusikiliza maelekezo ya Makocha wao pamoja na ari ya kuletea heshima katika mikoa yao kupitia mashindano ya mwaka 2022.



Mashindano ya Sanaa za Maeonyesho Yaendelea UMISSETA Tabora

Na Bryson Mshana – **TABORA**

Wanafunzi wa shule za Sekondari kutoka Mikoa mbalimbali ya Tanzania wameendelea kushindana katika mashindano ya Sanaa za michezo kwenye ukumbi wa Chuo cha Ualimu Tabora, ikiwa ni mwendelezo wa michezo ya UMMISETA 2022 inayofanyika kitaifa Mkoani Tabora.

Mashindano yaliyofanyika Agost 13, 2022, yalikusisha fani ya ngoma za asili kutoka katika maeneo mbalimbali, ambapo mikoa ilipata nafasi ya kuonyesha uwezo wao wa kuimba na kucheza ngoma za utamaduni wa makabila mbalimbali ya Tanzania.

Mikoa iliyohusika kwenye

mashindano ya Agosti 13, 2022 iligawanywa katika makundi ambapo kundi A lililoanza ratiba yake saa 3 Asubuhi hadi saa 6 Mchana liliwakilishwa na Arusha, Kagera, Dar es salaam, Simiyu, Dodoma, Kilimanjaro, Singida, Kigoma na Tanga.

Kundi lingine lilikuwa C ambalo liliwakilishwa na vikundi vya ngoma kutoka mikoa ya Pwani, Mtwara, Mwanza, Tabora, Rukwa, Katavi, Songwe na Geita ambavyo ratiba yake ilianza kuanza saa 9 Alasiri mpaka saa 12 Jioni.

Kwa upande wa wafuatiliaji wa mashindano hayo wamepongeza washiriki kwa

kuonesha ubunifu wa hali ya juu ikiwepo kuenzi utamaduni wa mikoa yao na Taifa kwa ujumla.

Afisa michezo kutoka idara ya Michezo na Utamaduni (WEMA) Zanzibar Bi. Salha Rajab Mrisho, amesema maonyesho hayo yanawasaidia vijana kuzienzi tamaduni zao ikiwa ni sehemu ya masomo na michezo.

“Nimefurahi kushuhudia mashindano haya, kuna jambo la kujifunza hapa maana kuna vitu vya tofauti kabisa hususan kule Zanzibar sisi hatuoni sana haya tunayoyashuhudia kwenye UMISSETA 2022” Amesisitiza Bi. Salha.



Zanzibar Yaonesha Ubabe Table Tennis UMISSETA

Na Shamim Nyaki – WUSM

Katika Mashindano ya Michezo kwa Shule za Sekondari (UMISSETA) mwaka 2022, Visiwa vya Zanzibar vimeonekana kuonesha uwezo wa hali ya juu katika mechi za awali za mchezo huo.

Katika michezo iliyochezwa Agosti 13, 2022 upande wa Wavulana Uwanja wa ndani wa Sekondari ya wavulana Tabora, Mkoa wa Mjini Magharibi umeigaragaza Njombe seti 02 kwa 0, huku Mkoa Pemba (Wasichana) ukiwakalisha wenzao wa Kaskazini Unguja kwa Seti

02 kwa bila.


Katika mechi nyingine ambayo iliwakutanisha Arusha na Kaskazini Unguja upande wa Wavulana, Kaskazini Unguja wamewabamiza Arusha Seti 02 kwa 00, huku mechi kati ya Mjini Magharibi na Kilimanjaro (Wasichana), Mjini Magharibi wao wameshindwa kutamba mbele ya Kilimanjaro baada kukubali kufungwa Seti 02 kwa nunge.

Mchezo mwingine ulikua ni kati ya Iringa na Dar es

Salaam (Wavulana) ambapo Iringa imepokea kichapo cha Seti 2 kwa 0 kutoka kwa Dar es Salaam, huku Morogoro ikiwadhibu Lindi (Wasichana) jumla ya Seti 02 kwa sifuri.

Wenyeji Tabora upande wa Wasichana, wamefanikisha kuibuka na ushindi mnono wa Seti 02 kwa Moja dhidi ya Arusha, ambapo pia mchezo kati ya Mtwara na Dar es Salaam (Wasichana) Mtwara wameidhibu Dar es Salaam kwa Seti 02 kwa bila.

UMITASHUMTA | UMISSETA 2022



#SensaBika

Limeandaliwa na Kitengo cha Mawasiliano Serikalini
Wizara ya Utamaduni, Sanaa na Michezo